

虞初續志

H922.1
4

0000163

虞初續志卷七

朱文學傳

玉纏鄭澍若醒愚編

金日升

文學諱祖文字完天。世爲雋李人。祖先應募禦倭功最。累陞都督大將軍。世襲蘇州衛指揮。以廉勇聞。文學幼孤。母劉勵節撫之。備集荼苦。文學長而端方穎異。雅不好武。被服儒行。有古人風。弱冠補博士弟子。痛母志節未揚。不遑寢食。吏部周公順昌初未識文學。會文太史震孟爲孝廉時。與文學習。談其母貞操特詳。吏部聞而憐之。慨然爲白。當道得類題取旨。部牒下郡。而文學始知。乃爲之感泣搏頰。願爲公死。無何吏部忤璫被逮。變起倉猝。都人士惶懼不知所爲。文學念此行必無全理。願相隨。視其後事。以圖報。慮家人或

相勸阻。遂不復歸。與吏部同宿。公所中夜從容。謂吏部曰。公灑然就道。良善。

然事。未可知。脫有緩急。誰可告者。吾當先往。爲地。吏部首肯。良久曰。徐銀臺。

名如珂
號念陽

肝膽如雪。必能相濟。顧侍御

名宗孟
號巖叟

新入臺中。意氣不薄。可與計事。

此外則定興之鹿。

名善繼
號乾岳

吳橋之范。

名景文
號質公

熱腸急難。一言相諾。生死不渝。

皆可告者。文學遂別去。先走都下。比吏部未至。有以滅門事中吏部者。得銀臺力辯而解。至橐籥薄鳩之事。侍御已先爲之所矣。已而懸賕數千。文學私幸。旦夕告完。或得議獄緩死。百計丐貸都門。不足。則走定興。定興不足。則走吳橋。冒暑單騎。間關千餘里。逗遛數十日。拮據稍就。而吏部已斃獄矣。吏部畢命之日。文學夜宿野店。有聲魂然。精誠相感。豈其誣耶。文學微服僻處。偵察動靜。每一感慟。聞者淒惻。凡往來津渡。出入禁門。時遭邏卒。徼倖獲免。亦危矣。然以身滯長途。弗獲視殮。有違初心。遂至鬱鬱以死。彌留之際。猶以吏。

部。後人爲念。嗟乎。文學之所以報吏部者。不已至乎。而總爲一念孝思所激。夫以文學之至性篤行。固足不朽。矧其附青雲之士哉。鄭醒愚曰。因孝思所激。遂以身殉義。與游俠一流迥別。

人變述略

失名

人變者。述姑蘇義民殺校尉之變也。天啓甲子秋冬間。逆璫擅政。屠毒縉紳。其門有五虎。五彪。五狗。十孩兒。二十小孩兒。四十猴獠。五百義孫之屬。所讐怨多在江南。乙丑六君子逮。常熟顧憲副大章與焉。丙寅逮江陰繆宮諭昌期。吳江周侍御宗建。俄又逮無錫高中丞攀龍。長洲周吏部順昌。江陰李侍御應昇。其時傳逮指名者。尙有八十餘人。緹騎之至。必踞坐府署中。檄所司徵逮者。逮者至弗得見。列諸械於署前。皆耳目所未經。如一銅鐐。摘人指立可折。其他不可枚舉。以是爲號。侈索賄。賄滿所欲。乃開讀。其初至也。父老有

生而未見之者。蓋神祖寬仁。五十年如一日。以江陵之炤。縉紳止於廷杖。然而士氣摧殘。已驅成邪媚世界矣。况慘掠煎熬。待士於囚虜之下乎。江南旣數見緹騎以爲常。而緹騎亦視江南爲熟遊故道。逮繆宮諭者。得三千金。未滿所欲。倉皇遂去。問之曰。急上趕差也。凡此輩出。璫之兒孫。及左右。皆有賄入。則數十倍利。如市販。然一時皇皇。莫必其命。周吏部之逮。在丙寅三月。吏部家故貧。直節亢爽。遇事敢言。初傳有天鑒點將諸錄。蓋逆兒所造。羅列諸正人。斥爲黨。獨未及吏部名。吏部慨然曰。此度遼有不與之恥也。益奮發無所顧忌。巡撫周公起元。以爭織造。元削奪歸。吏部爲文送之。所指斥內外甚具。後毛一鷺繼起。元撫吳。鷺固二十孩兒之一也。洎任之日。吏部則以送起元文送之。鷺恨切齒。遂與李實搆摘。魏給諫逮過吳門。吏部與聯姻事。而吏部逮矣。時武進有特走武林餽千金於李實。求逮孫宗伯。慎行。鄭庶常。鄧者。

會有言孫病劇。鄭已學道而免。然孫終不免戍。又欲殺之淮上。丁卯春。鄭與文殿撰震孟皆傳逮。意令驚怖自盡。如丁翰簡乾學故事。諸公於鄉里。故無嫌怨。直是諸兒孫借以獻媚。俗所謂送書帕云爾。逮者至蘇。吏部囚服待罪。邑令陳君至曰。公稍子家事。吏部笑曰。使君大異人意。吾聞江陰知縣岑之豹。當繆宮諭之逮。率兵快奄捕。繆夫人欲一見不可得。自稱在五百義孫隊中。此近例也。使君何異人意。且諦思之。吾無家事可子。顧左右曰。前有一僧求書。菴額此當了。卻因命紙筆大書小雲棲三字。擲筆笑曰。此外更無一事矣。後鄭庶常弔詩曰。銀鐙猶勒小雲棲。蓋實錄也。吏部同令君宿縣署。緹騎大索金錢。數日猶未開讀。士民望吏部顏色。如見天人。無不灑泣。欲爲請命。時陰雨連宵。如爲忠義泣。至開讀日出。自縣署就逮。百姓夾道執香。哭聲干雲。旣入憲署。諸校尉擁龍亭。緋衣捉械。怒目上視。巡撫毛一鷺拱立左。巡按

徐吉拱立右。觀者蜂擁。不下數十萬人。三學諸生肅而前。述士民意曰。大人有事地方。詎不知吏部居鄉立朝者。盡爲請於朝。撫按戰慄。不許一尉厲聲曰。今日事與秀才何與。諸尉各舉械將擊諸生。忽見叢中一人從人肩躍出。拽拳奔堂上。急持尉之掣械者。諸尉競捫之。人叢中復有四人繼出一躍登堂。遂與諸尉毆。首一人者。卽顏佩韋。餘四人者。馬杰。沈陽。楊念如。周文元也。五人持問尉。此旨從何出。尉曰。實是魏上公命我來。於是五人大呼共擊殺僞旨者。值天雨來者各以傘履喧聲震地。堂下萬履齊擲。諸尉伏撫按脇下曰。爺救我。撫按復趨。匿諸尉後。曰。老先生畢竟是駕上人。逡巡俱卻入署。內士民喧從之一尉。匿梁上。驚墮而入。後詢其黨名。李國柱本非校尉。乃行五百金賄。謀與偕來者也。是日開讀不成禮。撫按具疏奏聞。衆還過姑蘇驛。復遇一尉。蓋往浙逮黃侍御尊素者。騷驛遞需折夫馬百金。五人復聚毆之。

燬其舟之半。五人者謀曰。我輩拚死爲國除害。盡以千衆下武林。殺稅使。焚其府。以千衆下崑山。盡顧秉謙之家。然後自囚請死。雖寸磔有餘快。顏佩章曰。不可。吾儕小人。死何足惜。江南賢士大夫。尙多。使置我輩而反。借此傾諸賢。是我輩累之也。巡撫聞其言。則大喜。初逆璫亦無甚怨於諸賢。其兒孫實喉使之。及見撫按疏。璫色變。召呵曰。財賦盡在江南。彼爲變。奈何。政府部堂長跪不起。久之曰。有兒在。乃勒令撫按搜捕渠魁。五人者挺身自投曰。渠魁脅從皆我也。無波及。直向撫按大笑。爾陷吏部死。官大人小。我爲吏部死。百姓小人。大撫按無如之何。讞成大辟處決。五人顏色不改。逆璫聞之。頗銜李實。疏爲激變。實怖欲死。乃命浙撫潘汝楨。請建生祠以自解免。相望成風。生祠遂徧天下。政府魏廣微。顧秉謙。馮銓。施鳳來。張瑞圖輩。咸手撰碑文以爲榮。未一年。天祚聖明。逆璫授首。蘇州生祠垂成而廢。蘇人卽其下葬五人。大

銀臺吳公默。題曰。五人之墓。址甚曠。巨碑屹立。望之者咸以爲五人墓道。不知皆逆祠舊物也。或曰是逆物。五人固不享。宜悉仆之。或曰碑文作者之名。暮夜毀去。過者唾罵其視。五人之名坦然墓上。或揖之。或拜之者。不啻霄壤。是宜兩存。永留忠義如綫。開富貴場中冷眼。先是五人奮義日。江陰李侍御就逮。常州郡城士民聚觀者。亦數萬。方開讀時。有髮垂肩者。十人各挾短棍。直呼入憲署。殺魏忠賢校尉士民號呼從之。諸尉踉蹌走。越牆脫履狀甚狼狽。一賣蔗童子。十餘歲。撫髀曰。我恨極矣。殺卻江南許多好人。遂從一肥尉後。舉削蔗刀。齧其片肉。擲堦前。狗食之。時尉無死者。太守曾櫻素惠民。撫之須臾而定。故義民之名逸不傳。

其訓施曾省先生傳

施察字曾省。直隸宣城人。父宏猷。以理學祀於鄉。學者所稱中明先生也。察

孝友出天性。四歲時母以肉食奉舅姑。而自淡食。察爲祖父母所愛。數令侍食。退而見母食淡。悲痛仆地。移時不能起。其後侍食不舉肉。祖父母知之。每食肉。必以餘均母子。曰。兒孝。無傷兒意也。七歲就外傳。能守家學。通詩易。尤篤志孝經。晨起必焚香拜讀之。語人曰。夫子志在春秋。行在孝經。天經地義。不可須臾忘也。規行矩步。見父母色稍拂。則長跪請呵責。色愉乃已。初婚之夕。客強沃以酒。固謝不勝。父以爲忤客。目抖之。卽跪謝罪。客去退而跪於寢門。漏三刻。父引其手曰。婚媾大禮也。孺子過矣。居父喪。水漿不入口。貧不能葬。朝夕哭泣上食。三年不離苫次。旣殯。奉木主寢室。事大小告而後行。體孱甚。讀書盡丙夜。母戒止之。後乃候母寢。帷燈默誦。以爲常。術者言母算盡五十日夜憂懼。至形噩夢。號呼翼起。禱九華山。裒一紙焚之。伏地良久。兩裒皆濡淚。蓋請減算益母也。母竟以八十終。弟譽少長十歲。撫摩教誨。不遺餘力。

一夕月下共語。忽歎曰。吾兄弟始五人。今存者惟我與爾。願世世爲兄弟。因相抱而泣。聞者感動。譽讀書陽羨。會薦新。與客會食。烹池魚。曰。吾弟出門時。魚方二寸。今盈尺矣。遂鳴咽廢箸。終身布衣。而衣弟以帛曰。弟客遊在外也。其友愛類如此。曾世大父志穆無嗣。察父捐其田爲義田。歲數不登。族人欲鬻田完逋賦。察力復之。曰。此父志也。志穆所遺。四喪三女。悉已力經營之。人稱爲錫類云。卒時年僅三十七。嘗謂所親曰。惟愛而後教行。惟敬而後情至。今人於兄弟。升斗不相假。而欲其受教難矣。脫有督責。必且鬩牆。弗督則又秦越同氣也。時以爲名言。

鄭醒愚曰。孩提卽知孝親友悌。非平日深慕篤愛。何以能此。所以孝悌當預養於童蒙時也。若先生者。又根於天性矣。

李式王白虹妾胡氏小傳

胡氏自將食。察其腹。施閨章。雙金。計

禹航王子白虹。喪其妾胡氏。故娼也。逾年而悼不衰。哭以詩四章。乞余爲傳。書數至嘉。其微而賢。不忍終沒。故書之。胡名成靜。江西萍鄉人。生八歲。兵掠而北。長淪樂籍。自傷殘辱。矢必嫁官人。會王孝廉上公車。納之從歸。王道病且死者再。胡晝夜侍湯藥。得稍甦。抵家調膳數月。忠謹如一日。胡本以色見取。而米鹽針績事皆身任。夫人悉歸以筭。王令興安。則署以內事。倚之。更納新姬。無慍色。王遇事多任氣。人莫敢言。胡獨婉譬以解。時節宴飲。則泣下。傷少離父母。不得問。猶畧記其里籍。會興安有業銀者。萍人也。歸索而得其母。至則母子不相識。興安君指示曰。若奚疑。蓋體骨聲貌酷似矣。復奚疑。於是相抱大哭。留養於官舍。王以父艱還。封公以下。凡八喪。會葬者數百人。食飲百費。皆經紀於胡。無缺事。王泣曰。若功過介婦矣。然坐是得勞疾。所生女又夭。不敢慟。而心傷。旋病死。諸姬臧獲。皆哭之哀。先是始識王京師。則約曰。

君擢第。必納我。王固漫許之。胡已決意爲王婦。旣下第。遙望見便失聲。前相持哭。涕霑兩人衣。且曰。君不第不失一官。顧我不得爲良人婦。死且不瞑。又大哭。王義而贖之。舉債金數百。王以姬累。而卒賴其助。吾於是知人之貴。自振拔也。向使姬庸婦。不能早決。王爲俠丈夫。旣識其人。不能於失志時。痛自傾倚。王必不納。納矣。或恃色怙寵。不過羣妾畜之。久而愛弛。必不能見禮重以終也。吁乎。人可以不自振拔哉。

鄭醒愚曰。汧國夫人。豈乎不可尙矣。如胡氏者。亦可謂善自振拔者矣。

崔猛傳。崔猛。建昌世家子。性剛毅。幼在塾中。諸童蒙稍有犯。輒奮拳毆擊。師屢戒不悛。名字皆先生所賜也。至十六七。強武絕倫。又能持長竿。躍登夏屋。喜雪不平。以是鄉人共服之。求訴稟白者。盈階滿室。崔抑強扶弱。不避怨。

嫌稍逆之。石杖交加。支體爲殘。每盛怒。無敢勸者。惟事母孝。母至。則解母譴責。備至。崔唯唯聽命。出門輒忘。比鄰有悍婦。日虐其姑。姑餓瀕死。子竊啖之。婦知。詬厲萬端。聲聞四院。崔怒。踰垣而過。鼻耳唇舌盡割之。立斃。母聞之大駭。呼鄰子極意溫卹。配以少婢。事乃寢。母憤泣不食。崔懼。跪請授杖。且告以悔。母泣不顧。崔妻周亦與並跪。母乃杖子。而又以針刺其臂。作十字紋。朱塗之。俾勿滅。崔並受之。母乃食。母喜飯僧道。往往饕飽之。適一道士在門。崔過之。道士目之曰。郎君多凶橫之氣。恐難保其令終。積善之家。不宜有此。崔新受母戒。聞之起敬曰。某亦自念之。但一見不平。若不自禁。力改之。可免否。道士笑曰。姑勿問。可免不可免。請先自問。能改不能改。但當痛自抑。如有萬分之一。我告君一解死之術。崔生平不信厭禳。但笑不言。道士曰。我固知君不信。但我所言。不類巫覡。行之亦盛德。卽其不效。亦不至有所妨。崔請之。乃曰。

適門外一後生。宜厚結之。既犯死罪。此子能活之也。呼崔出。指示其人。蓋趙氏兒。名僧哥。趙南昌人。以歲侵饑。僑寓建昌。崔由是深相結。請趙館於其家。供給優厚。僧哥三十二。登堂拜母。約爲昆弟。踰歲東作。趙携家去。音問遂絕。崔母自隣婦死。戒子益切。有赴訴者。輒擯斥之。一日崔母弟卒。從母往弔。途遇數人。繫一男子。呵罵促步。加以捶扑。觀者塞途。輿不得進。崔問之。識崔者。競相擁告。先是有巨紳子某甲者。豪橫一鄉。窺李申妻有色。欲奪之。道無由。因命家人誘與博賭。貸以貲而重其息。要使署妻於券。貲盡復給。終夜負債數千。積半年。計子母三十餘千。申不能償。強以多人篡取其妻。申哭諸其門。某怒。拉繫樹上。榜笞剜劓。逼立無悔狀。崔聞之。氣湧如山。鞭馬前向。意將用武。母牽簾而呼曰。喏。又欲爾耶。崔乃止。已弔而歸。不語。亦不食。兀坐直視。若有所嗔。妻詰之。不答。至夜。合衣臥榻上。輾轉達旦。次夜復然。啓戶出。輒又還。

臥如此三四。妻不敢詰。惟慙以聽之。旣而遲久乃反。掩扉熟寢矣。是夜有人殺某甲於牀上。剝腹流腸。甲妻亦裸尸牀下。官疑申。捕治之。橫被殘酷。踝骨皆見。卒無詞。積年餘。不能堪。誣服論辟。會崔母死。旣殯。告妻曰。殺甲者實我也。徒以有老母。故不敢泄。今大事已了。奈何以一身之罪。殃他人。我將赴有司死耳。妻驚挽之。絕裾而去。自首於庭。官愕然。械送獄。釋申。申不可。堅以自承。官不能決。兩收之。戚屬皆誚讓申。申曰。公子所爲是我。欲爲而不能者也。彼代我爲之。而忍坐視其死乎。今日卽謂公子未出也。可執不異詞。固與崔爭。久之。衙門皆知其故。強出之。以崔抵罪。濱就決矣。會卹刑官趙部郎案臨。閱囚。至崔名。屏人而喚之。崔入。仰視堂上。僧哥也。悲喜實訴。趙徘徊良久。仍令下獄。囑獄卒善視之。尋以自首減罪。充雲南軍。申爲服役而去。未期年。挾赦而歸。皆趙力也。旣歸。申終從不去。代爲紀理生業。予之貲不受。緣撞技擊。

之術。頗以關懷。崔厚遇之。買婦授田焉。崔由此力改前行。每撫臂上刺痕。泣然流涕。以故鄉鄰有鬪。申輒矯命排解。不相承稟。有王監生者。家豪富。四方無賴不仁之輩。出入其門。邑中殷實者。多被刼掠。或迕之。輒遣盜殺諸途。子亦淫暴。王有寡嫠。父子俱烝之。妻仇氏屢沮王。王縊殺之。仇兄弟質諸官。王賕囑以告者坐誣。兄弟冤憤莫伸。詣崔求訴。申絕之。使去。過數日。客至。適無僕。使申淪茗申點而出。告人曰。我與崔猛朋友耳。從徙萬里。不可謂不至矣。曾無廩給。而役同廝。養所不甘也。遂忿而去。或以告崔。崔訝其改節。而亦未之奇也。申急訟於公堂。謂崔三年不給傭價。崔大異之。親與口對狀。申忿相爭。官不直之。責逐而去。又數日。申忽夜入王家。將其父子嫠婦並殺之。粘紙於壁。自書姓名。及追捕之。則亡命無跡。王家疑崔主使。官不信。崔始悟前此之訟。蓋恐殺人之累已也。關行附近州邑追捕甚急。會闖賊犯順。其事遂寢。